

山西通志卷第一百二十七

山西巡撫都察院右副都御史臣覺羅石麟奏

旨修輯

人物二十

平定州

明

和文字希文平定人文邃於學行誼甚高洪武四年舉通經
儒士除刑部郎中洊歷太子贊善致仕歸宴賞有加命有
司護送並令諸王大臣賦詩祖餞當世榮之

王中立平定人洪武四年以通經儒士除禮部員外郎陞刑
部侍郎轉中書禮部侍郎拜中奉大夫山西等處行中書
省叅知政事

閩察平定人洪武壬戌進士授禮科給事中收監察御史遇事敢言然不徼訐爲名高太祖嘗榜所言事於本州儒學爲諸生式出爲浙江布政司左叅議中使喻命至恃勢侵鑠察曰我朝廷方面官今爲中使辱何顏復泣吏民因繫諸獄擊殺之而以其狀上太祖驚曰壯士勅左右勿問尋擢左布政使以議事召還卒於邸賜祭葬有加

焦勝字復禮其先平定人徙居樂平其母夢吞月入懷遂生勝聰明特達才器過人中洪武庚午鄉科丁未成進士廷試一甲三名授翰林院編修改授岐山學諭永樂二年陞授都察院浙江道監察御史卒於官

吳昭孟人幼穎異喜博覽於五經諸史皆能通曉大義洪武間授中書省郎中以廉敏著後遷福建左布政使會天變

求直言抗疏條陳國事凱切明晰朝廷下詔褒之

吳印孟人布政昭從弟也少有卓識通古今事變元季托跡緇流放浪山水間爲高皇帝所知陝西布政使缺吏部以聞高皇帝曰某寺僧印可用也涖任果稱職改山東布政使副使張孟兼負其材以印舊爲僧頗輕之印上書言狀請歸田里避賢者路高皇帝罪孟兼而慰留印後遂占籍子孫不復返

石撰平定人以學行稱洪武中薦爲寧王左長史燕王舉兵撰在大寧輒爲守禦計每以臣節諷王王亦心敬之及燕兵襲大寧執撰憤詈不屈遂支解死

劉整孟人永樂辛丑進士知安定不恃苛刻而民胥治陞華州知州興利除害州人爲立生祠復陞山東叅議濬漕河

有功賜表裏服色轉叅政子二時敏中城兵馬時勉平涼府經歷

孫靖平定人永樂癸卯舉人任鴻臚序班陞都督府都事以言事忤石亨調四川渠縣有惠政卒於官渠人立祠祀之孫琦字叔閩孟人永樂甲辰進士試湖廣道御史清理刑獄未百日拜交趾道御史出按南甸彈劾百餘人三年代還條奏所見便利事改山東道御史琦剛直敢言然忠厚持大體嘗曰御史雖司糾察若推求細故以枉無辜則亦非朝廷設官本意久之轉江西按察司僉事擢工部右侍郎遷左侍郎改左副都御史奉勅審錄江南舟次河西邁疾有旨歸就醫藥卒賜祭葬如例

耿九疇字禹範平定人徙廬氏永樂末進士宣德六年授禮

科給事中議論持大體有清望正統初推擇爲兩淮鹽運司同知痛革宿弊條奏便宜五事著爲令母喪去場民數千人詣闕乞留起都轉運使廉聲益振婦孺皆知其名以事誣逮得白卽留爲刑部右侍郎屢辨疑獄無所撓屈禮部侍郎章瑾下獄九疇議貶其官給事中論刑部不公瑾卒如奏巡視鳳陽奏留英武飛熊諸衛軍耕守招來流民七萬戶境內以安自九疇去鹽政復弛景泰元年仍命兼理尋勅錄諸府重囚平反多釋旋兼撫江北諸府代還改撫陝西劾都指揮楊得青等私役操卒詔按治邊將請增臨洮諸衛戍九疇言邊城士卒非乏將帥能嚴紀律賞罰明信則人人自奮不然徒冗食耳乃不增戍又言邊將所以禦寇衛民也今使民避寇失業安用將帥因禁民入徙

有被寇者治守帥罪四年轉右副都御史大臣鎮守巡撫
皆授都御史自九疇始有旨市羊角爲燈引宋蘇軾諫買
浙燈事事乃寢災異求言請延儒碩公賞罰擇守令簡將
帥優詔報焉天順初議事京師上顧侍臣曰九疇廉正人
也留爲右都御史請繫都察院獄者給米乃日給一升遂
爲令又陳時弊五事皆嘉納之御史張鵬等劾石亨曹吉
祥亨等謂九疇實使之遂并下獄謫江西右布政使尋調
四川明年禮部缺尚書李賢曰老成清介無如九疇乃召
還旣至憐其老改南京刑部尚書四年卒謚清惠子裕

閻亨字淑泰孟人祖渾以進士授正定府知府父舉賢良任
四川崇寧知縣亨博通經史宣德間以貢授南康府經歷
清苦自甘歸橐惟書數卷子二文輔景泰癸酉舉人文德

成化戊子舉人

侃平定人正統丙辰進士授浙江道監察御史條陳六事
憲宗深用采納南京給事中王徽抗疏忤旨侃率同列論
救巡光祿太倉居庸等處所至有水蘘聲按廣東甦珠池
困陞陝西副使卒於官

喬毅字志宏樂平人正統辛酉舉鄉試第一戊辰成進士選
翰林院庶吉士改吏科給事中轉刑科英廟復辟前後數
上章言時政遷大理寺丞晉左少卿擢工部右侍郎督理
漕運時淮陽亢旱水淺舟膠雖加疏濬卒不得進毅齋沐
禱於神其夜潮水大至後陪祀山陵中道邁疾旣成禮遂
不起毅性孝友母晚得痿疾衣服飲食悉手自奉之事兄
恭謹如父居官不詭隨處僚友無機心自奉儉約雖履尊

顯不改常度卒後賜祭葬如例子鳳進士官兵部郎中孫
宇進士官吏部尚書

郭浩孟人正統間以貢授工部主事土木之變被執不屈死
事聞贈員外郎廕子思聰爲國子生後官鉅鹿主簿

韓能孟人正統間官隨駕將軍駐蹕土木能手執金瓜奮勇
力戰死之

賈琮壽陽人博洽羣書工文藝癸卯舉人授都督府經歷從
英宗北征死於土木之難贈奉直大夫協正庶尹

耿裕字好問平定人徙盧氏尚書九疇子也景泰五年進士

授庶吉士改戶科給事中轉工科天順初九疇爲右都御
史改檢討九疇坐劾石亨貶裕亦謫泗州判官終喪補定
州成化初召復檢討進修撰歷國子司業祭酒侯伯幼者

肄業監中裕采古諸侯貴戚言行爲書授之上聞而稱善
歷吏部左右侍郎代尹旻爲尚書大學士萬安與裕不協
而李孜省私其同鄉李裕欲使代裕相與謀中之坐以事
奪俸裕入謝上怒其不申謝孜省等因傾之遂調南京禮
部孝宗初轉南京兵部叅贊機務宏治元年拜禮部尚書
先後陳言甚衆大指歸於節儉給事中鄭宗仁疏節光祿
供應裕請納其奏巡視光祿御史田齋請借太倉銀償行
戶裕言疑有侵盜弊請勅禁防從之南京守備中官請增
奉先殿品物裕不可番僧多潛匿京師裕力請驅斥乃留
百八十二人餘悉逐之撒馬兒罕及土魯番皆貢獅子甘
肅鎮守太監傳憲圖形以進巡按陳瑤請却之裕乞從瑤
請而治憲違詔罪不從後番使頻有宣召裕言番人僭稱

可汗興兵犯順陛下優假其使適遇倔強之時彼將謂天朝畏之益長桀驁且番人狡黠不宜令出入內廷獅子野獸無足珍異卽遣其使還尋代王恕爲吏部尚書加太子太保御用監匠李綸等以內降得官先有詔文官不由臣部推舉傳乞除授者叅送法司按治綸不可除用再疏爭不聽裕銓政稱平兩世貴盛而家業蕭然父子並以名德稱卒年六十七贈太保諡文恪

喬鳳字廷儀樂平人毅子少穎敏五六歲從父口授尚書終卷成誦受業顧孟喬問學不間寒暑景泰七年舉於鄉明年天順改元舉進士方十九歲除武選司主事遷員外郎以母憂去服闋還原官進郎中丁父憂起職方司鳳揭陽座右觀四方山川城堡遠近夷險歷歷在目凡用將校

授方略悉奏効奉使廣西時邊警頗至鳳馳冒暑雨不三月還以過勞染疾卒年止四十有三鳳孝友居喪哀毀撫兄鸞遺孤皆成立和睦姻婭貧乏者時加存恤歲飢出粟賑困妻路氏柔慈貞靜稱賢配子宗尚寶卿字南京禮部尚書并顯於世

白思明平定人天順壬午魁於鄉成化丙戌成進士知嘉定縣縣濱海蜚蠊害稼爲文以祭一夜悉徙去築長堤千餘丈接上海崑山防海水泛溢入爲吏部文選主事歷員外遷考功文選兩司郎中再遷太僕寺少卿擢右僉都御史巡撫延綏先是掌選司時權貴請託峻拒不許至是遂噤言官論列降知兗州府尚書王恕三疏辨白胥不報調廣平入爲太僕寺少卿以內艱歸旣免喪將治園藝圃爲終

老計當道敦邇入都卒於邸訃聞遣官諭祭贈卹著有西軒集行於世弟思義舉人累官宗人府經歷思義子金舉人累官陝西僉事胥有賢聲

鄭冕樂平人舉進士爲御史天順時同張鵬等劾石亨曹吉祥下獄擬遣戍尋貶衡山知縣有善政憲宗初擢衡州知府特賜封誥

董旻樂平人成化時爲給事中早朝偕同官劾學士商輅等疏呈御前上不悅曰大臣進退有體旻等敢不循舊章亂朝儀耶旻等復合詞攻而詆禮部尚書姚夔尤甚遂下獄給事中毛崧疏救輅亦請寬乃杖二十復其官晉吏科都給事中爲吏所訐逮詔獄謫石曰知縣宏治時終四川叅議

岳壽陽人成化乙酉舉人以母老不急仕進弘治間授河間同知操履清嚴權要懾伏而事母晨昏惟謹母嘗撻疾崇親調湯藥扶持撫問不假婢僕閭里傳以爲範

楊傑字廷俊平定人有志操在太學爲冢宰耿好問所重成化壬辰成進士授翰林院編修遷翰林院侍講克經筵講官嘗進講尚書無逸篇至文王卑服卽康功田功反覆諷諭辭意剴至先是上頗事服飾至是感動悉屏去不復御尋以修憲宗實錄成遷司經局洗馬主應天鄉試還充日講官並東宮講讀官與修會典未成卒訃聞賜祭一壇

喬宇字希大樂平人祖毅工部左侍郎父鳳職方郎中皆以清節顯宇少學於楊一清成化二十年舉進士復從李東陽遊爲古文詞有名已授禮部主事宏治初吏部尚書王

恕調文選三遷至郎中門無私謁擢太常少卿武宗初祀中鎮西海還條上軍民困苦六事已遷光祿卿歷戶部左侍郎劉瑾敗獨無所染拜南京禮部尚書寢宮災率同列言視朝不勤經筵久輟國本未建義子猥多番僧處禁寺優伶侍起居立皇店留邊兵習戰鬪土木繁興織造不息凡十事不省久之改兵部參贊機務時上遠巡請早建儲貳上將自擊寇復偕同列諫曰夏太康畋於洛表后羿距之周穆王宴於瑤池徐方叛之今邊陲不警何故無名出師輕萬乘貴以投不測之險哉並不報未幾寧王宸濠反宇上其所移檄嚴爲警備而談笑自如時攜客燕城外密察地險易置戍守綜理周密內外宴然鎮守中官劉瑯通賊預伏死士宇刺得其情詰瑯用事者瑯不敢動乃大盡

城中斬所伏壯士三百人懸首江上宸濠失內應且知有備不敢東賜勅獎勞上至南京詔百官戎服朝明年正旦宇率諸臣朝服賀江彬索城門鑰宇曰守備者所以謹非常禁城鎖鑰孰敢索亦孰敢予雖天子詔不可得乃已彬矯旨求索日數十至必廷白之彬亦稍止而亟欲譖去宇守備太監王偉調護彬謀不行宇三疏請回鑾又伏闕請駕旋扈至揚州明年加太子太保論保障功復加少保世宗初召爲吏部尚書宇自爲選郎有人倫鑒及是銓政一清凡爲權倖黜者皆起列庶位旣而所執漸不聽興府需次官六十三人乞遷宇言此輩虛隸名籍與見供事者不同黜罰有差皆怨上欲封駙馬都尉崔元爲侯外戚蔣輪邵喜爲伯宇不可又詔進壽寧侯張鶴齡爲公封后父陳

萬言爲伯授萬言子紹祖尚寶丞宇言累朝太后戚屬無生封公者張巒亦歿後贈今奈何以父贈爲子封萬言封伯視巒更驟而子授尚寶非制願守典章以垂萬世並不從史道訐楊廷和言道挾私下之獄曹嘉助道劾宇宇求罷命趣視事上欲加興獻帝皇號宇言加皇於本生之親則干正統非所以重宗廟正名分及禮官請稱本生考上改稱本生皇考又詔建廟於大內宇等復連章諫特旨用席書爲禮部尚書宇又偕九卿言近罷汪俊用席書謫馬明衡季本陳逅召張璫桂萼霍韜舉措乖違人心駭愕且書特出內降此祖宗來所未有乞令俊與書各仍舊職宥明衡等止璫萼毋召尋復請罷璫萼書而出呂柟鄒守益於獄會璫萼等至皆用爲學士又言學士最清華而